

\c 14

\p

\s Nuik: Taiti-wali pega, sogo tandali pen go.

\r 1 Korintus 14:1-25

\v 1 Yang! Klum ngganemot-a, kangok so se usey! Nggano, motnang lo taiti-wali pega iti genang sogo, se uwet! Seni so, taiti-wali pega, Wime Newet lo taling go nebut pepen genang sogo-a, banim seni, se iti!

\v 2 Nggano, nando lo nebut iwot go pepen go, sedue kabung temu sono kua pepen gemang. No, Ki Wali Iram seguong nogo so pen go. Seni so, sedue kabung logo, nebut ngga ya kua senong. Ngga, Wali Newet lo iwot go nebut pen go gemang.

\v 3 No, nando lo, wali nebut Wali Newet lo, (kua iwot go,) ngga, ibe senong genang so pepen go gemang! Nabi ngganemot lo pu go nebut, blong duo yap mea buong, mang mea king, nggano, dabui suot genang sogo mea iti dali.

\v 4 Nando lo, nebut iwot go pepen go ngga, nemot tang go wali seguong-a, mea buong. No, wali nebut so ibe no pepen go ngga, nemot logo, blong duo yap mea buong.

\v 5 Seni so, motnang naklay, nebut iwot go pepen go senong go, genam yakay. No, seni-seni, motnang, wali nebut ibe no pepen go, ngga-a genam yakay kangok! Wali nebut so ibe no pepen go ngga, nemot go seni kangok gemang. Nando nebut iwot go pepen go, nemot go seni blong duo yap nogo, kua. No, nebut ngga tandali suey so pen go sogoso, seni gemang dali! Ngga kalik sogo, blong duo yap mea buong.

\v 6 Dem-debui, blong duo yap! Genam, motnang mit no weng gono, nebut iwot goso pepen go, no. Ki Wali Iram go duduing genam logo ya kua pen go, senong-duduing kua taling go, wali nebut Wime Newet lo taling go, ibe nogo kua pen go, motnang nogo wali demu kua nguok go, esang, genam motnang mit no weng go, nemot go seni sogo piam?

\v 7 Ngga, kluim ey taut, suling ey, bloma ey go susran go mo kerlam. No, kluim kerlam go seguong-a pupung go, sogo kalik so sedue kabung meno ya lek?

\v 8 Nggano, ple nang sogo so, kabui u go, kuim suey so kua tup go, sogo kalik so ya senong: nando-a, ple sogo ya ip go klong?

\v 9 Ngga kalik dali so, motnang lo nebut iwot goso pepen go, dia sono, neguon so kua pen go, sogo kalik ya senong? Motnang lo pepen go ngga, tebadali nebit tap no gemang betep.

\v 10 Seni so, kukunan blo sogo, nebut mata dega so gemang. Tagu i genang sogo, ya kua. Nemot-a ngga kalik go, no, klaya nang go, nebut seni kua go, kua.

\v 11 No, genam, nebut nenep sogo seni kua senong go, sedue ngga nogo, genam nenep so gemang ya lemoy dali. Seni so, imotnamon way-way sogo, nenep dali so mo lemoy.

v 12 Motnang, ngga kalik dali so nenep so kua lemoy! Taiti-wali pega Wime Newet logo iti genang sogo, kangok so duduing go, ngge se duing dali: Sogo kalik go taiti logo-a, blong dua yap ya buong?

\v 13 Ngganemot sogo so, nando lo, nebut iwot go pepen go, nemot tang go, dewi se pu dali, nemot nogo, nebut go seni ibe no pepen go, senong iti dali genang.

\v 14 Seni so, genam dewi so pupu gono, nebut iwot dali gono, pupu go ngga, waglo seguong lo dewi ngga gemang pupu. No, genam go senong-duduing, soso-sogo kua keng go pupu.
Nggenemot logo, nemot go seni ya kua ikum.

\v 15 Ngga kalik go, genam, sogo kalik ya? Genam go, waglo logo dewi mea pupu, no, senong-duduing logo se pupu dali! Nggano, genam go waglo logo u mea kukluo, no, senong-duduing lo go u se kluo dali.

\v 16 Yang! Mot lo, Ki Wali Iram nogo taiti suey, waglo seguong lo pupu go. sedue temu pluep go, nenep sogo tup go logo, sogo kalik ya pu: “Ya, amen, ngga seni!” Esang, nemot ya kua senong!

v 17 Mot go waglo lo Ki Wali Iram no taiti suey pupu go, ngga suey dali! No, ngganemot logo, meno duo nogo, don kok go buong genang sogo, mea kua.

\p

\v 18 Seni so, taiti wali-pega, nebut iwot go pepen go, genam nogo mo iti, motnang ey kua kerlam. Ngga tang so, Ki Wali Iram nogo taiti suey, genam gabe pupu.

\v 19 No, blong duo yap yaluim go nogo, nebut nangglik dato so, senong duduing pen golo, genam yakay ey mea ngunguok. Walong-bata so nebut iwot golo tebadali pepen go, genam yakay kua, nemot go seni kua ikum go.

\v 20 Dem-debui, blong duo yap! Motnang, senong-duduing-a, don ey se suing, denok seguay go kalik kua! No, tabat piam go semu genang-a, dabui bubuong ey, denok kalik so se! Yang! Motnang go kunala, iguong mo plet go sedue kalik se ip!

\v 21 Seni so, Wali Sam klaut ba no (senong genang) mo klik: “Genam lo blung nggenemot nogo saula meno go lom ba lo, nebut drom mea pen. “Esang! Motnang, Genam go wali nebut-drom ngga kalik go nogo, ya kua keng dali.”Ngga Ki Wali Iram lo pu go.

\v 22 Ngganemot sogo so, taiti wali pega, nebut iwot golo, pepen go ngga, Woy Dem kua keng go sedue kabung senong genang sogo, tasam gemang. Dabui lo keng go sedue kabung nogo so, kua taling gemang. Nemotnang tap meno senong genang gemang. Ngga taiti wali pega logo so, Wime Newet lo taling go wali nebut, ibe no ngunguok go.

Ngga sedue kabung keng goso taling go.

\v 23 Blong duo-yap klay gono yaluim go ku nogo, sedue kabung naklay, nebut iwot golo, meno-meno so pepen go, nggano, maning kua keng go sedue kabung, dia idi sogo degut go logo ngga tup gono, ya kua pu: “Motnang mo puplu ba?”

\v 24 No, motnang naklay lo Wime Newet lo taling go, wali nebut-a, ibe no pepen go, sedue demening go, maning kua keng go, degut go, nemot nogo, sedue kabung naklay lo nemot go dabui ba neguon go, ibe lo nemot go piam taling go mea ikum.

\v 25 Ngga tang so, nemot go dabui ba so kok go gigit go, dia no naklay mea plet. Ngga ey, Ki Wali Iram no ta kong so, nemot unuik go mea pu: “Seni so, Ki Wali Iram, motnang nesip so gabe!” \s Nuik: Blong duo-yap yaluim gono, lemoy genang sogo.

\r 1 Korinrus 14:26-40

\p

\v 26 Dem-debui, blong duo yap! Genam lo pen go nebut, nemot go seni motnang nogo, sogo piam? Genam lo duing go, ngge kalik: Nago no, motnang yaluim go nogo, sedue kabung klay-klay lo, Ki Wali Iram nogo iway se i-iti! Sedue meno lo, u-sam-a kukluo go! Meno duo lo, wali nebut se nguok!

Meno lo Ki Wali Iram sik sogo duduing-mang king-a se taling! Temu lo, taiti wali pega lo, iwot go nebut so se pepen! Ngga no, meno lo, nebut ngganemot go seni senong genang se pen dali! No, ngganemot naklay, wali don kok go, blong duo-yap buong genang so se lemoy!

\v 27 Nago no, taiti wali pega lo nebut iwot go gemang go, namon duo so se, kua go, nangglik si seguong lo, klay-klay se pen! Nggano, duo meno lo, nemot go seni se pen dali!

\v 28 Seni pen genang sogo sedue kua go, nemotnang blong duo-yap ba nogo, nebut kua pen goso, se suing-lak! No, nemot tang golo, Ki Wali Iram sono go-a, dabui ba lo se pepen!

\v 29 Ngga kalik dali so, nemotnang sik sogo lo, Ki Wali Iram go duduing so ibe no pepen go, namon duo lo, kua go, nangglik-si lo nebut se pen. Ngga ey, temu lo, nemotnang lo pen go ngga-a, suey so se plet!

\v 30 Sedue meno, ngga sogo no, Ki Wali Iram sik sogo, senong mo taling go, nando nebut so maning pepen go, yakot se suing. Ngga ey nemot lo se nebut ngganemot pen genang.

\v 31 Yang, motnang naklay lo, Wime Newet lo taling go wali nebut ibe mea pen. Ngga sik so, motnang naklay, nguok go, senong go, don kok genang.

\v 32 Nando Wime Newet lo taling nebut ibe no pepen genang taiti-wali pega ey go,

nemot go waglo - duduung ngga, bu logo kalik, ya kua saguip, no, ngganemot suey so ta ba sik so mea wasey.

\v 33 Seni so, Ki Wali Iram, suep-suep sogo kua duduung, no, suey yakay-a Nemot gemang iwat!

\p

\v 34 Ki Wali Iram go blung yaluim go nogo, kabung-kabung yakot so se susuing. Seni so, nemotnang lo nebut ibe nogo ya kua pen. No, Wali Sam Klaut ba no klik go kalik, sedue ba no se suing.

\v 35 Nemotnang, senong genang sogo, yap ba no, kenin nogo se usi. Seni so, kabung lo blong duo yap no, nebut pen go, ngga demu kua, suongsut ey!

\p

\v 36 (Esang, dabui klum, sogo tang so demu ngga, motnang kua kekeng?)

Ki Wali Iram go nebut, motnang bo blung sik so mo pung?

Kua go, motnang seguong nogo sogo, Ki Wali Iram go nebut mo iti?

(Sip meno nogo kua)?

\v 37 Nando lo duing go, “Genam ngge, Wime Newet logo taiti-wali pega ey go!”

Ngga kalik go, nemot tang go se senong: “Seni so, Paulus lo genamnang no kiklik go ngge, Ki Wali Iram go demu gabel!”

\v 38 No, demu ngge ta kua mlak go, blong duo yap temu logo, Wime Newet logo nemot no taling go, mea kua keng dali!

\

v 39 Dem-debui, blong duo yap! Genam lo pen go nebut tebot sogo, ngge kalik:

“Taiti wali-pega Wime Newet lo taling go nebut ibe no pen genang sogo, kangok so se u-usey! Nggano, nebut iwot go pepen go sedue kabung, ya kua tenguo!”

\v 40 No, ngga naklay, teguop so, suey dato seni so se lelemoy-do!